

दिनांक 02.09.2025
 समय: 18.45 बजे
 आकाशवाणी जयपुर—अजमेर
 प्रादेशिक समाचार

- प्रधानमंत्री नरेन्द्र मोदी कह्यो—देश मांय विकसित व्हे रह्या मजबूत सेमीकंडक्टर ईको-सिस्टम ऊं भारत दुनिया सागे होड़ मांय आवेला।
- केन्द्रीय राज्यमंत्री जयंत चौधरी जोधपुर मांय कह्यो—नौजवानां ने कौशल विकास अर तकनीकी ज्ञान बधावण री जरूरत।
- प्रदेश मांय 18 सितम्बर ऊं गांव चलो अभियान चलायो जावेला—सरकारी सेवावां री आसान पहुंच तय करी जावेला।
- राज्य मांय चौमासा री चोखी बिरखा ऊं नदी—नाळां मांय लगातार पाणी आ रह्यो है—693 मांय ऊं 384 बंधा पूरा भर्या।

.....

प्रधानमंत्री नरेन्द्र मोदी कह्यो है के भारत मजबूत सेमीकंडक्टर इकोसिस्टम विकसित कर रह्यो है, जो देश ने खुद रे पाण ऊबो करेला अर दुनिया मांय होड़ मांय लावेला। श्री मोदी आज नई दिल्ली मांय **सेमीकॉन इंडिया 2025** रा उद्घाटन रे मौके बोल रह्या हा। वे कह्यो के आवता बगत मांय भारत मांय बणबा वाळी सब ऊं छोटी चिप दुनिया मांय मोटा बदलाव लावेला। श्री मोदी कह्यो के दुनिया मांय सेमीकंडक्टर रो बाज़ार छह सौ अरब डॉलर ताई पूग ग्यो है अर आवता बगत मांय इण रे एक ट्रिलियन डॉलर रा लेवल ने पार कर जावण रा आसार है। वे भरोसो जतायो के भारत ई बाज़ार मांय खास भागीदार बनेला।

.....

कार्यक्रम मांय इलेक्ट्रॉनिक्स अर सूचना प्रौद्योगिकी मंत्री अश्विनी वैष्णव कह्यो के देश मांय सेमीकंडक्टर बणावण रा पांच कारखाना बणावण रो काम चाल रह्यो है। वे कह्यो के ऐड़ा दो और कारखाना कुछ महीना मांय काम सरु कर देवेला। ई मौके श्री वैष्णव प्रधानमंत्री ने भारत मांय बणी पहली चिप भेंट कीनी। आज सरु व्ह्या तीन दिन रा ई सम्मेलन मांय मजबूत अर टिकाऊ सेमीकंडक्टर इकोसिस्टम ने आगे बधावण माथे विचार कर्यो जा रह्यो है। प्रधानमंत्री रो काल सीईओ गोलमेज सम्मेलन मांय ई शामिल व्हेवण रो कार्यक्रम है।

.....

केन्द्रीय कौशल विकास अर उद्यमिता राज्यमंत्री जयंत चौधरी आज जोधपुर मांय केई कार्यक्रमों मांय शामिल ह्या। श्री चौधरी लूणावास भाखड़ गांव मांय भर रह्या तेजाजी रा मेळा मांय शामिल ह्या। ई दौरान व्ही सभा मांय वे कह्यो के राजस्थान कलाकारों अर शिल्पकारों री धरती है अर वां रा हुनर ने दुनियाभर मांय पिछाण दिरावण री कोशिशों करी जावेला। वे नौजवानों ऊं कौशल विकास अर एआई तकनीक ऊं जुड़बा री अपील कीनी।

.....

श्री चौधरी खेजड़ली शहीद मेळा मांय ई भाग लीनो। वे कह्यो के पर्यावरण ने बचावण अर जीवां माथे दया करणे वठे रा लोगों री ओळखाण है। ई मौके केन्द्रीय पर्यटन अर संस्कृति मंत्री गजेन्द्र सिंह शेखावत ई मौजूद रह्या। वे अमृता देवी ने नमन करता थकां कह्यो के जीव दया रो संदेश नुवी पीढ़ी तांई पूगावण री म्हां सगळों री जिम्मेदारी है। केन्द्रीय मंत्री राष्ट्रीय लोकदल रा कार्यकर्ता सम्मेलन मांय ई हिस्सो लीनो।

.....

जीएसटी परिषद री 56वीं बैठक काल नई दिल्ली मांय सरू व्हेला। वित्तमंत्री निर्मला सीतारमण री सदरत मांय व्हेवण वाली दो दिन री ई मीटिंग मांय मंत्री समूह री ओर ऊं जीएसटी रा दो स्लैब बरकरार राखण रा प्रस्ताव माथे फैसलो कर्ग्यो जावेला। **और ब्यौरो म्हाणी सहयोगी सालेहा गाजी ऊं—**

.....

आसान अर बत्ती साफगोई वाली **वस्तु अर सेवाकर** व्यवस्था सारू जीएसटी री रेट ओजू तैय करण ने ध्यान राखता थकां ई मीटिंग ने खास मानी जा रही है। कराधान व्यवस्था रा मौजूदा चार स्लैब्स ने दो स्लैब्स मांय बदलण री कोशिश करी जा सके है। वित्तमंत्री निर्मला सीतारमण मंत्री समूह री मीटिंग मांय कह्यो हो के जीएसटी संरचना मांय ई बदलाव ऊं आम जनता, किसानों, मझला तबका अर नान्हा कारोबारियों ने फायदो व्हेला। स्वास्थ्य अर जीवन बीमा रा प्रीमियम माथे जीएसटी रा बारा मांय ई मीटिंग मांय विचार व्हेवण रा आसार है। ई सागे ई कुछ सामान माथे कर लगावण या हटावण रा बारा मांय ई फैसलो कर्ग्यो जा सके है। प्रधानमंत्री नरेन्द्र मोदी ई स्वतंत्रता दिवस रे मौके वां रा भाषण मांय दीवाली रे मौके जनता ने उपहार मिलण री बात कही ही।

.....

राज्य वित्त आयोग रा अध्यक्ष डॉ. अरुण चतुर्वेदी आज राज्यपाल हरिभाऊ बागडे सागे मुलाकात कीनी। जयपुर रा राजभवन मांय व्ही मुलाकात रे दौरान श्री चतुर्वेदी राज्यपाल सामी आयोग री साल 2025–26 री अंतरिम रपट पेश कीनी।

.....

मुख्यमंत्री भजनलाल शर्मा आज राजस्व अर उपनिवेशन विभाग री समीक्षा बैठक लीनी। वे कह्यो के राजस्व विभाग काश्तकारों ने तकनीक रे जरिये सुबीता मुहैया करावण सारू नुवा-नुवा काम कर रह्यो है। मुख्यमंत्री कह्यो के ई सारू एग्री स्टैक मोबाइल एप बनायी ज्यो है, जिण ऊं किसान खुद साखां री गिरदावरी कर रह्या है। मीटिंग मांय अहलकार बतायो के फार्मर रजिस्ट्री योजना रे मार्फत सगळा जिलां मांय किसानों रा आधार नम्बर राजस्व रिकॉर्ड सागे जोड़बा रो काम सरू कर दियो ज्यो है अर हाल तांई 87 फीसदी किसानों रा किसान पहचान पत्र बण दिया ज्यो है। राज्य रा 48 हजार 463 गांवों रा जमीं रा नक्शा पोर्टल माथे अपलोड कर र करीब साढे चार करोड़ यूनिट लैंड पार्सल आइडेंटिफिकेशन नम्बर जारी कर दिया ज्यो है। ई बीचे प्रदेश मांय 18 सितम्बर ऊं **गांव चलो अभियान** चलायो जावेला।

सप्ताह मांय तीन दिन चालण वाळा ई अभियान रे जरिये गांव वाळां ताई सरकारी सेवावां री पहुंच आसान बणायी जावेला।

.....

राज्य रा ऊगणी हलका मांय घणखर ठोड़ां आवता पांच-छह दिन ताई मझला ऊं भारी अर कठे-कठे घणी भारी बिरखा रा आसार है। दूजी कानी जोधपुर अर बीकानेर संभाग मांय आवता दो दिन बिरखा रो ज़ोर कम पड़बा री संभावना है। ई बीचे लारला चौबीस घंटां मांय जयपुर, अजमेर, उदयपुर, कोटा, भरतपुर अर जोधपुर संभाग अर शेखावाटी अंचल मांय कठे-कठे ज़ोरदार मेह बरस्यो। सब ऊं बत्ती करीब 18 सेंटीमीटर बारिश दौसा मांय दर्ज करीजी। जल संसाधन विभाग ऊं मिली जाणकारी रे मुजब झालावाड़, जयपुर, करौली, भीलवाड़ा, नागौर अर हनुमानगढ़ मांय ज़ोरदार बिरखा व्ही। राज्य रा ऊगणी अर आतूणी हलकां मांय घणखर ठोड़ां हल्की ऊं मझला दर्जा री बिरखा व्ही। ई दफा चौमासा री चोखी बिरखा ऊं राज्य रा छोटा-मोटा 693 बंधां मांय ऊं 384 पूरा भर गया है, जद के 193 थोड़ा-घणा भर्या है। म्हाणा खबरनवीस बतायो के नदी-नाळां अर बंधां मांय पाणी रा बधता लेवल अर खतरा री शंका ने ध्यान राखता थकां प्रशासन री ओर ऊं जनता ऊं तेज बहाव वाळा हलकां ऊं दूर रेहवण री अपील करी जा रही है।

.....

रामदेव जयंती आज प्रदेशभर सिरधाभाव सागे मनायी जा रही है। ई मौके न्यारी-न्यारी ठोड़ां मेळा भर रह्या है। जैसलमेर ज़िला रा रामदेवरा मांय संवारे ऊं ई पैदल जातरूआं रा जत्था सतरंगी ध्वजा ले र बाबा रा दर्शन सारू पूग रह्या है। चूरू रा जूना रामदेव मिन्दर मांय सोहवणी सजावट करीजी है। श्रीगंगानगर रा रामदेव मिन्दरा मांय मोटी तादाद मांय जातरू पूर्या। तेजादशमी ई उमाव सागे मनायी जा रही है। लोकसभा अध्यक्ष ओम बिरला कोटा रा नान्ता मांय राख्यी ज्या तेजाजी महोत्सव मांय भाग लीनो। म्हाणा नागौर खबरनवीस बतायो के तेजाजी रा जन्म स्थान खरनाल मांय भर रह्या मेळा मांय मोटी तादाद मांय भगत शामिल व्हे रह्या है।

.....

ई मौके पाली मांय भक्ति संध्या राख्यी ज्यी है। ब्यावर मांय भर रह्या तेजाजी रा मेळा मांय कबड़डी, कुश्ती अर वॉलीबॉल समेत न्यारी-न्यारी होडां मांय मोट्यार बड़-चढ़ र हिस्सो लीनो। काल जलझूलनी ग्यारस रे मौके केई ठोड़ां धार्मिक अनुष्ठान अर मेळा राख्या जा रह्या है। म्हाणा चित्तौड़गढ़ खबरनवीस बतायो के सांवलिया सेठ मिन्दर मांय आज तीन दिन रो मेळो सरू व्ह्यो।

.....

केन्द्रीय कपड़ा मंत्री गिरिराज सिंह आज कपास किसान ऐप री सरूआत कीनी। सरकारी मोल माथे खरीदी री योजना रा तैत किसानां ऊं कपास री लगातार खरीदी सारू ओ ऐप चलाई ज्यो है। ई रे जरिये किसानां ने खुद पंजीकरण करावण, स्लॉट बुकिंग अर चुकारा ऊं जुड़ी जाणकारी रो सुबीतो मिल सकेला।

.....